

Siunnersuummut nassuiaatit

## Nassuiaatit nalinginnaasut

### 1. Aallaqqaasiut

Inissianut aningaasalersuisarneq pillugu inatsisartut inatsisaata nr. 39-p, 23. november 2017-imeersup aamma pigineqatigiilluni inissiat pillugit inatsisartut inatsisaata nr. 33-p, 23. november 2017-imeersup akuerineqarnerini taarsigassarsiat siusinaarluni maanna naliusut malillugit akilerneqarsinnaalernerat siunnersuuteqarnermut tunngavigineqarpoq.

Siunnersuut manna aqutugalugu, Namminersornerullutik Oqartussat kommunillu inissiaataannik attartortittakkanik inissiatut imaluunniit illutut nammineq pigisatut tigusisarneq pillugu Inatsisartut peqqussutaat nr. 12, 19. november 2007-imeersoq, kingusinnerusukkut allannguuteqartinneqartoq naapertorlugu taarsigassarsisimasut siusinaarlutik taarsigassarsiaminnik akiliisinnaasartut assigalugit siunissami periarfissaqarnissaat kissaatigineqarpoq.

Attartortup inissiamik attartukkaminik inissiatut imaluunniit illutut nammineq pigisatut tigusineranut atatillugu, attartortoq tunisinermit akiusup 40%-ia tikillugu Namminersorlutik Oqartussaniit imaluunniit kommunimiit taarsigassarsitinneqarnissamik piimasaqarsinnaavoq. Namminersorlutik Oqartussat imaluunniit kommuni tunisinermit akiusup sinneranut aningaasalersueqataasinnaangillat. Taarsigassarsiat ukiuni 20-ni erniaqartinneqanngillat akilersugassaanatillu, tamatumalu kingorna taarsigassarsiat ukiuni 15-ini amerlaqatigiinnut agguarlugit akilersorneqassapput, ukiumut Nationalbankip erniarititai ilallugit 3%-inik erniaqartinneqartunik. Tassalu piffissaq taarsigassarsiat akilersorneqarfissaat katillugit ukiunik 35-inik sivilissuseqassaaq. Taarsigassarsianik piffissami sivilissuuni siusinaartumik akiliisoqarnerani, Namminersorlutik Oqartussani aamma kommunini aningaasanik atugassaqartitsilernissaq, taamaalillunilu aningaasanik siunertanut allanut atugassiinnaanissaq naatsorsuutigineqarpoq.

Taarsigassarsialik taarsigassarsiami sinneri siusinaartumik akilerniarlugit kissaateqarpat, siunnersuummi matumani taarsigassarsisup taarsigassarsiani maanna naliusut malillugit siusinaartumik akiliisinnaanissaa periarfissinneqarpoq.

### 2. Siunnersuummi immikkoortut pingaarnerit

#### a) Inatsit atuuttoq

Namminersornerullutik Oqartussat kommunillu inissiaataannik attartortittakkanik inissiatut imaluunniit illutut nammineq pigisatut tigusisarneq pillugu inatsisartut peqqussutaanni nr. 12-imi, 19. november 2007-imeersumi, kingusinnerusukkut allannguuteqartinneqartumi taarsigassarsialik taarsigassarsiaminik, attartortumiit piginnittumut aqqissuussineq malillugu taarsigassarsiarisimasaminik siusinaarluni akiliisinnaanissaa periarfissaqartinneqanngilaq.

b) Siunnersuut

Siunnersuummi taarsigassarsiallit, Namminersornerullutik Oqartussat kommunillu inissiaataannik attartortittakkanik inissiatut imaluunniit illutut nammineq pigisatut tigusisarneq pillugu inatsisartut peqqussutaat nr. 12, 19. november 2007-imeersoq naapertorlugu taarsigassarsisimasut taarsigassarsiaminnik siusinaartumik akiliisinnaanissamut periarfissinneqarput, taamaattorli siusinnerpaamik taarsigassarsiat tunniunneqarneriniit ukiut tallimat qaangiunnerini tamanna pissaaq.

Aalajangersakkamik §14 b-mut ilanngussisoqarnissaa siunnersuutigineqarpoq, taamaalillunilu attartortumiit piginnittumut aaqqissuussineq naapertorlugu taarsigassarsiat siusinaartumik aammalu maanna naliusut malillugit akilerneqarsinnaalissapput, inissianik aningaasalersuisarneq pillugu Inatsisartut inatsisaanni nr. 39-mi, 23. november 2017-imeersumi aamma piginneqatigiilluni inissiat pillugit inatsisartut inatsisaanni nr. 33-mi, 23. november 2017-imeersumi periarfissarititaasut assigalugit.

<b>Siunnersuutip inatsimmut atuuttumut sanilliunneqarnera</b>	
<i>Oqaasertaliussaq atuuttoq</i>	<i>Siunnersuut</i>
	<p style="text-align: center;"><b>§ 1</b></p> <p>Namminersornerullutik Oqartussat kommunillu inissiaataannik attartortittakkanik inissiatut imaluunniit illutut nammineq pigisatut tigusisarneq pillugu Inatsisartut peqqussutaanni nr. 12-imi, 19. november 2007-imeersumi, Inatsisartut inatsisaatigut nr. 26-kkut, 17. november 2017-imeersukkut allannguuteqartinneqartumi imatut allannguisoqarpoq:</p>
	<p><b>1. 1. § 14a-p</b> kinguliani §14 b ilanngunneqassaaq: ” <b>§ 14 b.</b> Taarsigassarsisup taarsigassarsiani maanna naliusut malillugit sioqqutsilluni akilersinnaavai. Taarsigassarsisup taarsigassarsiani sioqqutsilluni akilerpagit, akiitsut sinneri ullormi qinnuteqaatip tunniunneqarfiani 3%-inik ernialerlutik Nationalbankip erniarititaanik ilallugit utertitassatut kisitsisitalerneqassapput. Akiitsut sinneri piffissamit, taarsigassarsisup</p>

	<p>allakkatigut akiitsuminik akiliiniarluni qinnuteqarfianit aammalu taarsigassarsiat piffissap erniaqartitsiviunngitsup akilersuiffiusussaannngitsullu sinneranut kingumut ernialernejassallutik, taamaattorli siusinnerpaamik taamaaliortoqarsinnaavoq taarsigassarsinermit ukiut tallimat qaangiunnerini.</p> <p><i>Imm.2. imm.1 taarsigassarsianut januaarip aallaqqaataa 2019 sioqqullugu tunniunneqarsimasunut aamma atuutsinneqarpoq.”</i></p>
	<p style="text-align: center;"><b>§ 2</b></p> <p>Inatsisartut inatsisaat 1. januar 2019-imi atuutilissaaq.</p>

Siunnersuut aaqquussineruvoq, pisortat aningasaataannik inissianut pituttorsimasunik annikillisitseqataasinnaasoq. Maanna naliusut malillugit taarsigassarsianik taarsiinerit taarsigassarsiat piffissami akilerneqarfimmini nalingi taarsigassarsiat erniaqanngitsut akilersugassaannngitsullu sinnerisa atuuffiitut naleqqiullugit naatsorsorneqassapput.

Utertitsilluni kisitsisitaliussat taamaalillutik annerpaamik ukiunut 15-inut tunngasuussapput. Maanna naliusut malillugit siusinaartumik akiliinermi erniat (3%) tunngavigalugit naatsorsuisoqartarnissaa siunnersuutigineqarpoq, taamaalilluni tamanna pisortanut taarsigassarsititsisunut taarsigassarsisunullu iluaqutissanngortinneqassalluni.

Naatsorsuisarnissamut assersuut:

2010-mi juulimi inissiamik piginnittup attartortumiit piginnittunngorsinnaanermut aaqquussaaq aallaavigalugu inini nammineq pigilerpaa 850.000 koruuniimik akilerlugu. Akigitinneqartoq aallaavigalugu 40 %-imik taarsigassarsititsisoqarpoq, katillugulu tamanna 340.000 koruuniulluni. Taarsigassarsiat 2030-mi juunip tungaanut erniaqassanngillat akilersugassaassanatiluu, tamatumalu kingorna 3 %-imik Nationalbankip erniarititai ilallugit ernialernejassapput, ukiunilu 15-ini akilersugassaallutik.

Inissiamik piginnittoq 2019-imi siusinaartumik akiliinissaminik qinnuteqarpoq, naak suli ukiut 11-it taarsigassarsiani erniartaqanngitsut akilersorneqartariaqanngitsullu. Taarsigassarsiat atsiorneqanerini aningaasartaliussat katillugit 340.000 koruuniusut piffissap

erniaqartitsiviunngitsup akilersuiffissaanngitsullu sinneranut 3 %-inik kingumut ernialerneqassapput. Matumani ukiut 11-t pineqarput. Tamatuma kingorna taarsigassarsiat atsiorneqarnerini aningaasartaliussat nalingi  $100 * 1/(1 + 3/100)^{11} = 72,24$  tunngavigalugu naatsorsorneqarput.

Inissiamillu piginnittup akiitsut sinnerinut 245.616 koruunit akilissavai.

Piffissaq erniaqartitsiviusussaanngitsoq akilersuiffiusussaanngitsoq sinneruttoq	Aningaasat nalingi
15	64,19
14	66,11
13	68,10
12	70,14
11	72,24
10	74,41
9	76,64
8	78,94
7	81,31
6	83,75
5	86,26
4	88,85
3	91,51
2	94,26
1	97,09
0	100,00

### 3. Pisortanut aningaasaqarnermut allaffissornermullu kingunerisassat

Taarsigassarsiaareersunik siusinaarluni maanna naliusut malillugit akiliisinnaaneq pisortat karsiisa missingersuutaasunit siusinnerusukkut iluanaaruteqarsinnaanerini kinguneqassaaq. Maanna tunngavissat tunngavigalugit taarsigassarsimasut qanoq amerlatigisut periarfissamik atuiumaarnissaat missiliorneqarsinnaanngilaq.

### 4. Inuussutissarsiutinik ingerlataqartunut aningaasaqarnermut allaffissornermullu kingunerisassat

Siunnersuutip inuussutissarsiutinik ingerlataqartunut kinguneqartinneqarnissaa naatsorsuutigineqanngilaq.

## **5. Avatangiisinut, Pinnngortitamut inuillu peqqissusaannut kingunerisassat**

Siunnersuutip avatangiisinut, pinnngortitamut inuillu peqqissusaannut kinguneqartinneqarnissaa naatsorsuutigineqanngilaq.

## **6. Innuttaasunut kingunerisassat**

Taarsigassarsiaareersunik siusinaarluni maanna naliusut malillugit akiliisinnaaneq innuttaasumut iluaqutaassaaq, innuttaasoq siunissaq ungasissoq eqqarsaatigalugu sipaaruteqarsinnaassammatt.

## **7. Kingunerisassat annertuut allat**

Siunnersuutip annertuunik allanik kinguneqartinneqarnissaa naatsorsuutigineqanngilaq.

## **8. Oqartussaasunut suliniaqatigiiffinnullu il.il. tusarniaaneq**

Siunnersuut [www.naalakkersuisut.gl](http://www.naalakkersuisut.gl) aqqutigalugu 12. juni 2018 –imit 6. juli 2018 tungaanut tusarniaassutigineqarpoq.

Siunnersuut ukununga tusarniaassutigineqarpoq:

Siulittaasup Naalakkersuisoqarfia

Pinnngortitamut Avatangiisinullu Naalakkersuisoqarfik

Aningaasaqarnermut Naalakkersuisoqarfik

Aatsitassaqarnermut, Suliffeqarnermut Nunamullu Namminermt Naalakkersuisoqarfik

Aalisarnermut, Piniarnermut Nunalerinermullu Naalakkersuisoqarfik

Inuussutissarsiornermut Nukissiuuteqarnermullu Naalakkersuisoqarfik

Isumaginninnermut Inatsisinillu Atuutsitsinermt Naalakkersuisoqarfik

Peqqissutsimut Iisimatusarnermullu Naalakkersuisoqarfik

Ilinniartitaanermt, Kultureqarnermt, Ilageeqarnermt Nunanullu Allanut Naalakkersuisoqarfik

Avannaata Kommunua

Qeqqata Kommunua

Kommuneqarfik Sermersooq

Kommune Kujalleq

Kommune Qeqertalik

KANUNUPE

INI A/S Iserit A/S

Agerskov Consulting ApS

SIK (Sulinermt Inuussutissarsiuteqartut Kattuffiat)

Kalaallit Nunaanni Sulisitsisut (GE)

Peqqinnissaq Pillugu Kattuffiit (PPK)

Nunatsinni Perorsaasut Kattuffiat (NPK)

Atorfillit Kattuffiat (AK)

IMAK (Ilinniartitsisut Meeqqat Atuarfianeersut Kattuffiat)

Kalaallit Nunaanni Ilinniagartuut Kattuffiat (ASG)  
Mittarfeqarfiit  
Nukissiorfiit  
Asiaq  
Katuaq  
Kalaallit Nunaanni Rigsombudi  
Kalaallit Nunaanni Politimestereqarfik  
Kalaallit Nunaanni Eqqartuussivik

Tusarniaanermi akissuteqartut uku siunnersuummut oqaaseqaatissaqaratik nalunaarput:  
Siulittaasup Naalakkersuisoqarfia  
Aningaasaqarnermut Naalakkersuisoqarfik  
Ilinniartitaanermut, Kultureqarnermut, Ilageeqarnermut Nunanullu Allanut  
Naalakkersuisoqarfik  
Peqqissutsimut Ilisimatusarnermullu Naalakkersuisoqarfik  
Nukissiorfiit  
INI A/S  
Sulisitsisut  
Kalaallit Nunaanni Ilinniagartuut Kattuffiat (ASG)  
Qeqqata Kommunia

Piffissap tusarniaaffiusup naanerani tusarniaaffiusunit ukunanga akissutinik  
tigusaqartoqarpoq:

Kommune Kujalliap siunnersuut isumalluarnartoqartippaa, kommuni innuttaasunit arlalinnit, Inatsisartut peqqussutaat nr. 1, 19. november 2007-imeersoq naapertorlugu taarsigassarsianik sioqqutsilluni akiliinissamik kissaateqartunit saaffigineqartarmat. Aamma Kommune Kujalliap nammineerluni sioqqutsilluni akiliisinnaaneq soqutiginaartippaa, tamanna aningaasanik, missingersuusiarineqartuniit siusinnerusukkut atugassaqalernissamut periarfissiimmat. Tamatuma saniatigut Kommune Kujalleq siunnersuummut allanik oqaaseqaatissaqanngilaq.

Kommune Qeqertalik isumaqarpoq, siunnersuut innuttaasunut, pisortat aqputigalugit inissianut aningaasalersuinissamut taarsigassarsisimasut naligiinnerulernissaannut aqputissiuisoq taamaattumillu tapersiilluni.

## **Siunnersuummi aalajangersakkanut ataasiakkaanut oqaaseqaatit**

### *§ 1-imut*

#### *Imm. 1-imut*

Taarsigassarsiat piffissami akilerneqarfissaminni nalinginik naatsorsuinermi taarsigassarsiat taarsersorneqarnissaannut piffissap sinnerani aningaasat naleerukkiartornissaat eqqarsaatigineqassaaq.

Suleriaatsit aalajangersimasut malillugit pisortat erniaqartitsiviunngitsumik taarsigassarsiarititaat akileraarutissaanngitsutut isigineqarput, erniaqartitsiviunngitsut nalingat apeqqutaatinnagit. Taamatuttaaq taarsigassarsiat atsiorneqarnerminni amerlassusaat tunngavigalugit maanna naliusunut utertillugit kisitsisitalerneqarnerini nalikilliliinerit, akileraarutaasusaannginnissaat siunnerfigineqarpoq.

#### *Imm. 2-mut*

Imm.1-imi aaliangiussaq taarsigassarsianut januaarip aallaqqaataa 2019 sioqqullugu pissarsiarineqarsimasunut aamma atuuppoq.

### *§ 2-mut*

Aalajangersakkami siunnersuutip piffissaq atuutilerfissaa allanneqarpoq.